



Menningar- og viðskiptaráðuneytið
Skúlagötu 4
101 Reykjavík

Reykjavík, 9. mars 2022

Efni: Umsögn um frumvarp til laga um breytingu á kvikmyndalögum nr. 137/2001 (Skilyrtir framleiðslustyrkir o.fl.)

Umsögn MATVÍS, Rafiðnaðarsamband Íslands, VM félag vélstjóra og málmæknimanna og Samiðn samband iðnfélaga, (hér eftir, öll saman, nefnd Fagfélögin) er eftirfarandi:

Fagfélögin fagna efni frumvarpsins í heild sinni sem felur í sér aðgerðir til að styðja við framleiðslu, sölu og dreifingu leikins sjónvarpsefnis.

Félögin gera hins vegar tillögu um breytingu á 3. mgr. 2. gr. kvikmyndalaga um skipun í kvikmyndaráð en engar breytingar eru fyrirhugaðar á greininni samkvæmt því frumvarpi sem nú liggur fyrir. Samkvæmt núgildandi ákvæði skipar ráðherra átta fulltrúa í kvikmyndaráð til þriggja ára í senn, formann án tilnefningar en hina sjö samkvæmt tilnefningu eftirtalinna aðila: Félags kvikmyndagerðarmanna, Framleiðendafélagsins -SÍK, Samtaka kvikmyndaleikstjóra, Félags kvikmyndahúsaeignenda, Bandalags íslenskra listamanna, Félags íslenskra leikara og Félags leikskálda og handritshöfunda.

Einn af þeim aðilum sem tilnefnir í kvikmyndaráð samkvæmt tilvitnuðu ákvæði er Félag kvikmyndagerðarmanna en kjaradeild þess félags sameinaðist Félagi tæknifólks árið 2020 sem er stéttarfélag tæknifólks innan Rafiðnaðarsambands Íslands og Fagfélaganna. Með vísan til þess sem að framan segir leggja Fagfélögin til að "Félagi tæknifólks" verði bætt við upptalninguna í 3. mgr. 2. gr. laganna yfir þá aðila sem tilnefna fulltrúa í kvikmyndaráð.

Virðingarfyllst, f.h. Fagfélaganna

Elsa María Rögnvaldsdóttir

Elsa María Rögnvaldsdóttir
Lögfræðingur